

西  
堂  
詩  
集

悼亡詩序

凡筆

天地間皆文也文由情生秋聲淒惻風瑟號日

候斂藏氣機鬱抑天地若爲悼之之時也況于人生耶  
然關雎之詩曰哀而不傷乃得人情之正尤子今日悼  
亡之情寔正而不可以其多情少之也古所稱梁鴻孟  
光之風尚矣偕老之樂終有時散尤子豈不達觀而故  
爲此詩娓娓不休亦其情止乎理故不能已已嗚呼文  
情相因非窮愁困苦則詩必未工以尤子少年才名老  
而好學砥志乃待詔公車復遭此悼亡之感則情之益  
動于窮而文自益工將見窮者不終于窮則卽以此詩

爲雲中之歌比于乘鸞吹笙者流而又何悼乎吾故偶  
見而爲之序戊午仲冬之杪昌黎學人偶題

哀絃集

悼亡詩

長洲 尤 侗

哭亡婦曹孺人詩六十首

宛是當年曹大家西風吹作斷腸花故人宿草鴛鴦塚

愧我飄蓬老鬢華

少時與亡友湯卿謀客江上卿謀戲採秋海棠封寄題云昔日美人淚今

日斷腸花試拭望鄉眼何如曹大家爾時一笑絕倒今偶念及不覺腹痛家讀如字

記得青春新結襦紅窓日暖曉妝時夜臺猶拂芙蓉鏡

惆悵無人與画眉

曾剪新衣換故衣故衣猶在故人非酬卿綸翟終何補

焚向靈牀蝴蝶飛

貧家旨蓄百般無朝屑胡麻暮剪蔬常憶紙窓風雨夜  
伴人猶自煮茶爐

名珠賣盡典釵梳供奉郎君助讀書讀破千篇贖未得  
鵲裘貰酒愧相如

長干鍛羽幾年年擁髻挑燈黯共憐薄命自拚淪落慣  
看君泣玉轉淒然

干戈滿地走斜塘避亂全家寄野航黃土築牆茅蓋屋  
布衣常自學村妝

三年閨夢繞遼陽砧杵聲中憶故鄉襍被歸來官橐冷  
弓鞋猶帶薊門霜

萬里扁舟寄五湖  
罷官先回灌園圖  
閨中幸有同心約  
君把長鏡妾辟纒

卜居愛向曲池邊  
暇日臨流亦偶然  
爲看鴛鴦雙戲水

綠楊影裏採紅蓮

園池畜魚婦命去魚種蓮常有鴛鴦飛來

雞鳴問寢向高堂  
冬壓梨膏夏蔗漿  
獻與公姑甘旨了  
還留一盞阿郎嘗

兩度麻衣泣倚廬  
尊章痛定復愁予  
君歸應向官山塢

先到泉臺問起居

先人墓在官山

黃花時候白楊風  
忌月驚心吾父同  
敢爲白炊私下淚

血痕啼斷蓼莪中

先君忌辰同在九月

每思阿父客長安旅殯荒原白骨寒莫望秦川腸斷絕

魂遊萬里道塗難

婦翁歿  
瘞秦中

閑居眉案整相莊偶語訴諧嗔我狂可惜閨房失良友  
斷絃真痛子期亡

少愛吟詩謾詠懷賭棋中酒事全乖得君苦口嘗小損  
每歎卿言亦復佳

靈芸鍼指最聰明舞鳳盤龍頃刻成手把書編嘗太息  
此身恨不作諸生

明智能如辛憲英談言微中使人驚平生崛強狂奴態  
不覺低頭服老成

高懷曠達欲離塵似得禪家三昧因每向佛前私懺悔  
願兒勿作有情人

持家健婦治饔飧井臼親操閤曉昏樺燭三條人未寢  
重重屈戌自關門

辛苦熊丸五夜儲殷勤教子惜三餘雖無絳帳宣文授  
常剪青燈課讀書

勗兒日夜望青雲桂樹難連杏苑春一領錦衣消不得  
誰家八座太夫人

最憐少子未成名八月金陵自遣行聞道秋風仍報罷  
病中猶聽拊牀聲



三年懷抱泣呱呱銜食營巢心血枯養得兒成母已去  
何時反哺報慈烏

三女追隨緩緩歸獨憐早寡歎無依傷心更有池陽夢

盼斷吳天音信稀

長女早寡次女  
隨婿宦池州

兒家新婦總清貧並坐言愁情轉親手脫金釵曾贈與  
試開遺篋定沾巾

妯娌逢迎共七家歲時笑語聚誼譁重經妝閣誰携手  
怕見階前姊妹花

垂老含飴喜弄孫衆雛堂下簸錢奔不知阿母歸何處  
索棗尋梨尚繞門

鹿門偕隱勸休官豈笑鮎魚上竹竿不是 君王親下  
詔肯教夫子入長安

二十年來臥起同一朝分手各西東無從永訣成長恨  
十尺蒲帆慘澹風

公車冬上未爲遲父子相携取便宜回首翻成風木痛  
含珠何處喚嬌兒

千里奔喪哭望鄉計程一月伴靈柩河梁剩有生離苦  
白髮吞聲倚夕陽

長卿消渴臥成都憔悴文君擁藥爐君病何曾親煮藥  
白頭怨殺薄情夫

一生二豎苦摧戕秋月春花半在牀曾燕梅檀禮玉斗  
璇官不賜返魂香

玉臂雲鬟見客羞生前小照不曾留欲知舊日妝樓樣  
八字雙眉只回愁

家貧賣盡嫁衣裳蓬鬢荆釵不掃妝翻笑亂頭粗服好  
佳人難得是糟糠

雖然寒薄也連娟鬢髮如雲學少年殉汝口脂共眉黛  
湘裙十幅颺黃泉

愛栽香草滿庭中羅袖闌珊倚晚風此日花神應泣血  
荼蘼變作杜鵑紅

家常一飯尚嫌多  
辟穀安能起宿痾  
每到秋風欣嗜芰  
前溪愁聽采菱歌

每恨生慳山水緣  
虎丘鄧尉木蘭船  
早知老去無閑伴  
悔不藍輿掛酒錢

願依繡佛奉長齋  
懊惱家緣事不諧  
但乞觀音充作婢  
沉香塑像拔金釵

蛾眉不妒見猶憐  
我自鍾情小比肩  
縱有玉簫同錦瑟  
那能續得斷腸絃

出門小別便沈瀾  
長夜悠悠淚豈乾  
空寫秦嘉書一首  
誰貽地下報平安

東坡集  
平時舉箸勤加餐珍重添綿護晚寒今日征衣誰更寄  
祇留針線手中看

昨寄雙魚折柳條曾從書尾附參貂嫦娥無計施靈藥  
那得昭君更助嬌

問米求薪事事難冥途應自缺盤纏一生不識開元字  
今日多多送紙錢

我望吳門魂黯黯離魂還望雁門天平生未識長安路  
莫向黃河問渡船

金門待詔未能歸一念家山淚滿衣獨立蒼茫極目處  
黃雲萬里塞鴻飛

笳聲吹斷續砧聲數盡銅壺滴五更更是惱人眠不得  
隔牆夜哭聽驢鳴

獵獵寒風撼板扉鬼聲髣髴響孤幃可知一夜西山雪  
盡爲君家換白衣

音容想像是耶非欲問鴻都術已稀應是楚巫招未到  
夢魂不向朔風飛

欲賦長楊慚子雲料錢先向大官分縱然索盡長安米  
割肉何年遺細君

骨肉情親寄一厘頻沾斗酒慰燈前人閒那得消愁處

夜炷清香叩玉仙

彭子訪濂  
移予同寓

素車白馬滿燕臺  
輦上諸公弔汝來  
謝客詩詞傳彩筆  
分明泣淚變瓊瑰

杳杳重泉哭不聞  
梵宮修懺薦文君  
一聲玉磬魂來否  
稽首慈悲依紫雲

生來小膽怯空房  
忍令閻羅殿上行  
但問兒夫道名姓  
憐才或遇校文郎

王母蓬山盡女流  
捲簾侍女亦堪收  
瑤宮花史曾相識

提起劉郎共話愁

花史降乩予家有小傳

達生亦解讀南華  
鼓缶而歌終是差  
若使莊周化蝴蝶  
飛來還戀合歡花

暫別同衾劇可憐  
應知同穴尚千年  
三生石上精魂在  
願結同心再世緣

淚眼模糊終夜開  
車輪腸轉幾千迴  
每思元相傷心句  
貧賤夫妻百事哀

淒入心脾哀感頑艷徐正字之贈月君耶元左相之  
憶蕙叢耶自非太上無情能不惻然增伉儷之重彭  
羨門評

又律詩十首

生相憐愛死相捐  
隔絕燕吳萬里天  
結髮未能同白首  
齊眉何日及黃泉  
牀前蠟燭流紅淚  
瓦上霜花飄紙錢  
想盡千言并萬語  
夢中期與話蟬聯



石闕銜悲恨血枯刀環虛約藁砧孤塚中薜荔招新鬼  
山上蘼蕪憶故夫留得羅衣供布施想成玉貌費描圖  
子規叫斷黃泉路剪紙歸來魂有無

少年奉倩漫傷神垂老無妻倍苦辛曉起梳頭添白髮  
夜眠搔背少紅巾何年作誄思夫子此日箋詩廢碩人  
常道新人不如故故人安得更如新

鬼火空吹葭管灰陰風難逐一陽回菱花寶鏡塵常滿  
荷葉羅裙褶不開上食祇憐小婢在倚閭還望大兒來  
夜啼別鶴朝飛雉并作人間曲可哀

昨夜征夫夢故鄉帳中髣髴見啼妝卽看笑語渾如舊

欲問寒暄忽已忘死別生離都惻惻人間天上兩茫茫  
無端画角霜天曉爲爾吟風一斷腸

一生涕泣每漣漣我笑君何不自持今看淚零堪洗面  
始知愁絕足低眉賣珠難學多錢賈繆釜空勞無米炊  
肖盡艱辛先脫去不知地下可含悲

大雅原無兒女情也曾親愛喚卿卿幾番夜月階前待  
無限春風枕畔生自小慣憐割袖戲到今猶憶墮釵聲  
藏鈎鬪草尋常事說着春閨老淚橫

長安咫尺望遼西從宦曾尋桃李蹊千里采薇勞至止  
三年零雨賦歸兮傷心野屋寒砧急極目長城愁黛低

一自東征大家去至今人說使君妻

劈盒分釵長恨歌天長地久豈消磨相逢猶怨風花晚  
獨坐翻嫌歲月多私誓最憐霍小玉迴文誰寄寶連波  
君王尚唱哀蟬曲臣妾能無喚奈何

太上忘情自古難聽人慰解轉闌干百年抔土終同盡  
萬里孤身強自寬麗蘊公婆偕事佛劉綱夫婦並驂鸞  
翠微夢斷槐安夢幻相當同和景

翠微宮沈亞之事  
槐安國淳于棼事

皆悼亡夢也

神傷之什哀抑之音杜絕偷空同茲悽惋羨門評

悲者不可爲衆歎理之固然也人言愁我亦欲愁情  
之必至也讀悔菴先生悼亡諸篇雖木石腸亦應感  
動况振觸舊愁如僕乎因簡篋中往作悼亡詩三十  
五首質之悔菴語云下瀨之魚因復俱流其吾兩人

之謂歟濟南同學弟王士禎拜啟

王阮亭先生貽札云十一月望前一日夢先生以  
嫂夫人小照屬題視之乃瞿曇像也覺與子側  
家兄言之淡爲歎異予有感焉漫成二絕

君爲天女我維摩却倩王維作輓歌何處謁來何處去

衆香國裏好婆娑

亡婦臨終滿  
屋闌拊檀香

一生稽首事金仙讓汝先歸忉利天我是文人多慧業  
機鋒不及老婆禪

又絕句十首

春到人間人到無東風何日入黃壚閤門尚貼宜春字

誰剪釵頭綵燕符

淒然歲盡鴈書遲腸斷吾兒哭母詩北望燕山更愁絕  
孤燈白髮暮寒時

書中何有只啼痕見說臨終無片言兒女滿前揮手去  
萬緣解脫近禪門

哀告青華乞賜恩昨宵太乙下天門傳言汝婦靈山上  
新換袈裟禮世尊

予拜青華寶誥太乙降  
乩云十婦已脩淨土矣

百日光陰轉盼間香魂一去不知還夜臺人面應如舊  
却訝潘郎滿鬢斑

彈指冬殘又小除年年眉鎖未曾舒含愁每問春來未

自向牀頭檢曆書

重修水懺到招提我佛慈悲眉也低忍見白衣白髮叟  
自携麥飯祭亡妻

可憐人與歲俱分笑語難尋哭不聞四十年來無此夜  
滿爐楮紙錢焚

匆匆卒歲事紛拏勉強追歡鬧合家常記夜深人散後  
私斟杯酒獻椒花

沉沉玉漏守何年我判鰥魚夜不眠夢去驚聞叫三峽  
兩兒哭倒總帷前

樂府補題

并序

宋人有樂府補題五闕都門諸子多和之者予方有  
悼亡之痛故情見乎詞若此覽者憫其情而略其詞  
可也

天香 咏龍涎香

雲氣盤山雨痕粘草海天遙識龍睡細剪香涎平分瑞  
腦汎水滲沙同膩

龍涎上品汎  
水次日滲沙

烟鬟霧髻髣髴見織綃

娘子檀口唾花幾點絲絲篆成心字 猶憶瑣窓半閉

裊金鳬共消殘醉惆悵遺芳夢杳蕙蕪誰寄聚窟返魂  
何處空留下餘薰舊鴛被贏得鮫人玉盤珠淚

水龍吟 咏白蓮

誰家淥水銀塘凌波扶出霓裳女天然素面冰肌玉骨  
暗香銷暑採向吳宮画船相傍盈盈解語看碧天涼夜  
風清月曉長依白鷗爲侶 幾處紅衣亂舞翻嫌他脂  
勻粉浣蓬茅綦繡鉛華洗盡淡妝偏嫵最恨西風斷魂  
憔悴幾番秋雨歎隨波敗葉飄零祇滴淚珠如許

摸魚兒

咏蓴

問江姝寶釵半股又繞青絲一縷洞庭漁父扁舟遠摘  
盡吳頭楚尾誰得似似放誕文君柔滑如脂體佳人本  
訢算不比浮萍波漂露宿何事名千里 東曹掾爲爾  
挂冠歸去西風昨夜還起愁予老繫京華夢正恐欲歸



無計歸也未便一棹家鄉偕隱無人矣春前尚記想素  
手調羹和鹽伴鼓飽識厨娘味

齊天樂

呀蟬

小園疎柳斜陽晚淒然數聲低喚吸露頻啼迎風乍咽  
迸出悲絲急管官商偷換和五夜寒蟬一天哀雁恨殺  
螳蜋驚回焦尾鷗絃斷當年齊女曾變故宮衰草外  
何限秋怨羅袂無聲玉蟬塵滿落葉幾番零亂餘音宛  
轉想動影低鬟妝殘簾捲杜甫山妻夜飛人不見予去歲九  
月病中詞有不見夜飛蟬山妻劇可憐之句今年九月婦亡亦詞識也

桂枝香

咏蟹

漫尋爾雅見介士橫行郭索盈野最愛紺田青匡金膏  
雪炙吳江公子腸應斷甚西風酒旗瀟灑相逢何處沙  
汀漁火村莊茅舍 記卓女長卿初嫁爲彭越低眉停  
箸不下我亦蝻蟬暗想妝臺愁把

王吉夢一蝻蟬舍都亭翼日司馬長卿至

吉日此人文章當橫行一世因呼蝻蟬爲長卿文君終身不食先文簡公戲呼楊文公爲羊楊戲呼公爲蝻蟬

以音同也

香橙手劈吳鹽細欲持螯誰傳杯筆霜華滿地黃

花已老玉人去也

潘懷縣遺桂在壁韋蘇州芳巾染澤每一吟諷輒欲涕零悔菴先生賦物五闋借題抒寫尤覺文句之外託寄無窮旁皇不盡阮亭評

評

微辭幽緒宛轉關生博物志本事詩合爲一手義門

浣溪紗二首

清明日作

陌上家家挂紙錢東風客舍淚潸然難携杯酒滴重泉  
朱戶幾人同插柳青山何事尚含烟江南夢繞斷腸  
天

少女長安歌踏春鸞韉翠襪已成塵棠梨時候獨沾巾  
官草幾年堆燕冢土花終夜照魚燈 君王猶自望

昭陵

孝昭皇后忌日  
駕幸沙河設祭

昭君怨

春盡

不見落花飛絮滿目土風沙雨漂泊可憐人奈何春  
地下杳無消息盼斷回衣香舄白日掩青簾夢江南

生日得授官信口占寄亡婦絕句四首

終日思君淚滿巾  
何心馬齒問生辰  
盤中尚設江南果  
不見當時勸酒人

白首君恩拜爵時  
泥金無路報卿知  
香車一去長遺恨  
不作迴波歡喜詩

青史編摩彤管垂  
隄廛欲屑遠山睂  
傷心擁髻人何在  
燈影淒然玉漏遲

太乙宮中苦行身  
受生誓不向紅塵  
知君待我三山畔  
幾見嫦娥再嫁人

宮使傳語亡婦感  
予情至誓不託生

小重山

午日對雨

曾記端陽話別時  
菖蒲新剪結泛雙卮  
卜歸笑咏采藍詩  
重逢處五日以爲期

婦問予何日歸耶予漫應曰五日爲期

分手哭

天涯佳辰誰續命  
斷紅絲今宵飛夢繞靈帷  
黃梅雨和淚落前池

病中口占二首

萬恨經年病已遲  
昏昏覩魄杳無之  
寧幃驚起今何夕  
月落空階泣別時

最難遣病是他鄉  
誰同寒溫總斷腸  
那得羅衣擎玉碗  
便教苦藥化瓊漿

七夕有感二首

渡河消息未分明惆悵人間梁玉清  
忍看馬嵬環下死底須私語誓長生

七孔鈿針五色瓜瓜風流遺事彩雲斜  
何心更乞天孫錦散作香兒吉慶花

九月十九日亡婦周忌述哀三首

歲月忽如墜羈旅愁飛翻朝看白露滋  
暮已青霜繁

是日

霜降伊人逝一載音容邈何存昔爲參與昴  
今爲辰與昏

晨昏不相見幽明並銜冤塊然坐一室  
私慟聲還吞失我歲寒友重裘豈能溫  
誰勸加餐食多病廢饔飧望空遙設祭  
想像臨芳樽庶仗慈悲力鐘鼓招靈魂

相如對文君梁鴻携孟光仕隱雖不同同心各相將  
翻京華客窮窮飾帷房他人被繡衣我獨歎無裳篋中  
舊襦袴針線百千行摻摻出素手猶見理殘妝我持白  
衣冠過墓如新喪日月有時盡悲思何能忘

予聞計在十月十六日故未除服

昨夢草堂開爲君作生日前席羅杯繁後房陳笙瑟兒  
女迭拜舞新妝儼褕翟我亦將進酒歡笑未終畢遽然  
一夢醒伏枕淚沾臆玉漏正三更殘月照東壁攬衣起  
徘徊鳴蟲助歎息人生無百年彭殤諒如一焉知懸悅  
辰不同屬纊夕人鬼何茫茫齊物忘欣戚勉思昔人言  
莊缶猶可擊

除服題寄三首

孫楚淒然除服時一年景物總成悲  
靈帷遠望三千里淚盡西風那得知

君死何緣我獨生夜臺消息未分明  
江南尺土皆無恙

正好長眠莫浪驚

家中有傳予地震死者故及之

挑燈獨坐遣家書但囑兒曹問起居  
此後挽詩成閣筆九泉更莫盼雙魚

除夕再哭亡婦六首

形影依依夢不分一朝相失萬重雲  
鏡中白髮燈前淚永夜沉吟只爲君



春花秋月幾傷神，忍見辛盤又薦新。  
一領朝衫殊不戀，妝臺無復卷衣人。

椒花酒盞柏枝爐，旅舍淒涼佳事無。  
舊日紗窓空總帳，五更鬼火一燈孤。

萬里家山望几筵，誰携魚菽祭靈前。  
可憐索米長安客，羞澁空囊乏紙錢。

愛河苦海兩茫茫，生死因緣總斷腸。  
夫婿飄零兒女弱，九泉回首淚千行。

親舊相逢且盡杯，思君獨夜悵徘徊。  
祇應扈從天妃駕，翠蓋霓旌共往來。

太乙云：亡婦今在天妃宮。

哀絃集

挽詩

隨到隨編不分前後

梁清標

蒼巖真定人官戶部尚書  
二首

翟莠魚軒 帝澤饒夫人荆布自蕭蕭縫裳餘馥留刀  
尺繡佛清齋遠市朝炊白夢回無限恨椒花頌絕可憐  
宵帳中月冷魂何在環珮珊珊似可邀

相莊十載臥中林何事淒涼寶瑟音共說高柔輕仕宦  
遽令孫楚動哀吟遺往著壁空帷淚暮雪挑燈遠客吟  
我亦曾經傷落葉把君詩句更沾襟

王士禎

阮亭新城人官侍讀  
三首

三年明月鑒虛帷那更吟君惆悵詩不分阿灰腸斷句

黃昏微雨畫簾垂

予悼亡亦三年矣

金昌亭下柳毵毵長記啼鳥送曉驂風景不殊人不見  
謝家飛絮滿江南

入洛相逢亦偶然淮南小別十經年不堪洗馬言愁日  
無復清河贈婦篇

汪

琬

鈍翁長洲人官編修  
三首

攜手名山願已虛玉臺寂寞總帷除不知他日焚魚後  
誰共先生挽鹿車

燕山吳水萬重雲獨鶴哀鴻不可聞從此藁砧空悵望  
斷無人與寄迴文

一颿愁吟一慘然錦衾如水不成眠此生我亦鍾情者  
夢斷香銷二十年

李天馥

容齋永城人官學士  
三首

金門未許遂幽棲隴首先亡王霸妻試向玉河橋上望  
溝頭流水自東西

漫記簾釘挂綠裙當窓誰織竇家文春還不見璇璣轉  
愁殺遼西舊使君

銀牀斷梗素絲懸每讀新詞淚暗牽不道顧榮貽婦句  
竟成潘岳悼亡篇

孫一致

止瀾鹽城人官侍讀學士

寒月依依落素暉  
燕山吳水不勝悲  
重泉夢斷鴛鴦冷  
獨夜風來環珮稀  
蘋白澗南虛挈筥  
燈昏堂北寂鳴機  
徽音贏得昭彤史  
褒誥還看下紫微

施閨章

愚山宣城人官侍講

空期偕隱恨何如  
鍾郝徽音沒有餘  
身貴蒿簪仍舊物  
病拋錦字竟無書  
教兒幾度九熊膽  
垂老難忘挽鹿車  
共道安仁情太劇  
可堪重促鬢毛疎

沈 荃

釋堂華亭人官詹事

離鴻方賦歲將闌  
忽聽鸞分玉鏡殘  
十載鹿門瑤瑟冷  
三秋龍塞珮聲寒  
綸衣不改荆裙素  
畫荻何辭井臼難

最是秦樓孤月夜黃門有句淚空彈

毛奇齡

大可蕭山人官檢討

秦嘉垂老上計車閨中無復紅羅襦長卿獻賦不歸去  
那得有婦留空居熒熒白兔走且顧南北東西隔長路  
挽鹿難追司隸驄隨鴻先傍要離墓金刀割水斷不成  
悼亡賦罷顛毛生從人但道婉婉節使我頓增伉儷情  
當年司法北平右共識使君自有婦今來被召入帝  
京不道寒房報炊臼桃林關前桃樹新東風吹作灤河  
春相尋僅認盧龍路應遇金臺夢裏人

彭孫通

羨門海鹽人官編修  
三首

一別翻成萬古哀南園春色闕青苔也知荀倩神傷甚  
無復中庭取冷來

花落花開一愴神野棠飄盡故園春可憐蜀禰承恩日  
不見牛衣對泣人

生從紫府結前因太乙宮中辨道宸玉格他年同證取  
曾聞天上有橫陳

宋實穎

既庭長洲人官教諭  
二首

碧玉當年玉鏡臺雕文羽帳爲誰開迴思三十年前事  
問寢高堂幾度來

京華襖被自蕭然况復寒燈夜不眠騎省悼亡才未盡

流蘇遺挂最堪憐

孫枝蔚

羽人三原人官中書  
四首

幸爲才子婦曾是女中師鸞馭今何往雞鳴竟不知孤  
桐心半活一劒匣初離遂使長安道爭傳潘岳詩

聞道于歸後金銀首未華光真是鴻配已不羨鄒家伴  
讀能終夜鳴機對落霞如今傳往事七誠可同誇

司李榮華暫夫人計慮長惟思大門戶日勸誦甘棠繡  
佛千針指生兒兩鳳凰但留彤管在亦勝返魂香

五日期曾否千秋遂永睽沒爲翰林婦生笑太常妻割  
肉將誰遺修書合獨栖從今看燭跋只似數行啼



李念慈

毗瞻涇陽人官知縣

青蓮初作赴徵詩

太白有別內赴徵詩

潘岳旋吟悼婦詞往事清

貧皆可念新恩朱紱亦堪悲視含遺恨憐冢子

時長公以公車

侍先生在京

執燭何心命侍兒

先生受纂修明史

旨

說與旁人猶墮

淚那容鰥客不哀思

葉封

慕廬黃州人官主事

玉鏡如冰照比肩紫鸞虛影月娟娟夢回永訣三千里

腸斷雙棲四十年歸遺空餘天子賜修行長憶少君

賢祇應悔有凌雲賦華髮平添一惘然

鄭重

山公建安人官吏部郎中

深閨鏡掩碧秋天此日餘徽記昔年蘋藻芳型諸黨誦  
萱堂慈訓兩難傳乘龍偕老人安往跨鶴長辭瑟但懸  
桓少從今云渺矣臨風悵望欲潸然

王頊齡

荆湖華亭人官編修

玉質冰心邁謝庭雲環遙佐綠莎廳十年落月盧龍塞  
千里淒風瘞鶴亭巖石望夫春夢斷熊丸教子晚燈熒  
悼亡更比安仁切待詔金門淚欲零

王鴻緒

嚴齋婁縣人官貢善

壺範千秋婉女宗深閨紗幔話從容鹿車早遂林泉約  
鳳詒渾忘禮數重偕隱雄文懸日月傳經令器總鸞

龍那堪奉倩神傷後翻爲徵書萬事慵

陳錫嘏

介眉鄞縣人官編修

鶴書飛出五雲邊一夕驪歌促別筵正好秋風貽錦字  
那知夜雨損花鈿夢隨流水吳江冷魂黯關山朔雪連  
却捧新綸思故劍縫裳猶滴淚痕鮮

李因篤

子德富平人官檢討  
二首

太史徵車萬里來援琴中斷不勝哀愁聞入舍帝鴈劇  
屢乞還鄉画鷁催玉佩淒迷無夢到羅幃舒卷有人開  
寧知出處渾難卜別酒翻同永訣杯

椎布蕭然鮑孟門鹿車曾荷五雲恩凌風羽翮爭瞻

子繞膝芝蘭已抱孫岐路且沾離席淚異香翻隔故園  
魂多情荀粲應千古薄俗悠悠難具論

馮雲驤

訥生振武人官刑部郎中  
二首

黃菊蕭蕭已暮秋乘鸞聞向岱宗遊傷心不及鴛鴦鳥  
烟水蘆花到白頭

遠客安仁忽悼亡西風落葉涕寒螢他年抱甕歸來日  
愁過看雲舊草堂

彭定求

訪濂長洲人官修撰  
四首

歎息安仁賦夫人是大家同吟邊塞月早灌故園花日  
煖看雙壁風清傲六珈遺書今尚在誰與寄秦嘉

錦瑟真同調如何未百年徵書雙闕迥噩夢九秋懸別賦成哀諫離尊促奠筵銀河重悵望新月又孤圓

祕閣新恩重傷心憶細君鳴雞催曉漏歸鴈帶殘雲頻和哀蟬曲空披織錦文瑤宮還可問環珮幾時聞

重以葭莩戚徽音杳與齊依鄰知杜母投契感山妻躡

躡青門去淒涼彤管題哀哀罷社日同伴夜烏啼

予早失恃

故與慧兄同感

張

烈

武承大興人官編修二首

結髮從君子攤書啓後人相期當遠大不負共艱辛卿相知名久朝廷促詔頻歡欣營別席長謝卽茲晨

夫子承天寵新官在禁林超朝憑僕侶歸舍罷鳴琴垂  
老亡良友高飛失和音傷心非一事遺挂已難尋

黃興堅

庭表太倉人官編修

歷歷冰霜母德勞蠶鹽卅載手親操相夫埋鹿貧猶慣  
教子九熊苦倍遭檢點衣裝傳薊札封題藥裹寄吳舫  
傷心報喜西清日只有空帷薦濁醪

周清原

浣初武進人官檢討  
五首

閭閻方爲世所儀那堪鸞馭遽長辭淒風忍見飄丹旄  
冷月空來照素帷公輔詞章隆黼黻叔文家學和墳簞  
當年象服貤封久會有恩綸下玉墀

素絲琴瑟自諧聲竹枝紗巾遂稱情誰令獻書來帝里  
燕臺一望客心驚

詔書徵出白雲鄉雨滴梧桐秋夜長青鳥去時雲跡斷  
初聞涕淚滿衣裳

風露淒淒秋景繁爲君惆悵又黃昏芙蓉帳冷雲屏暗  
環珮空歸月下魂

白雲歸處寄鄉心客舍經時益苦吟無路從容陪笑語  
斷絃收與淚痕深

李澄中

渭清諸城人官檢討  
二首

回首姑蘇閱歲時傳來消息轉堪疑仙人誤贈還魂草

賦客重裁長恨詞，別鶴空留琴裏怨。舞鸞自向鏡中悲，多情最是安仁切。遺挂蕭蕭冷蕙帷。

情根萬劫迴難消，好禮空王聽落潮。老去秦嘉空贈婦，別來弄玉罷吹簫。寒衣手製香猶在，舉案心驚夢已遙。有子承家復何恨，鸞書況下聖明朝。

沈珩

昭子海寧人官編修

生年不論早與暮，人間總是傷離別。出門一去誰復知，回首濃陰變紅纈。前日寄書加餐飯，後日寄書成決絕。吳門簫斷草蟲悲，燕市夢沉黃鵠咽。早知勸駕進離絃，悔不懸車還熨熱。但使徽音彤管留，春蘭秋菊長堪擷。



丘象隨

季貞山陽人官檢討

夫子凌雲賦始傳傷心早聽悼亡篇放歌不效莊周達  
痛哭難忘德曜賢遙憶彌留都是淚未聞遺囑最堪憐  
於今哀誄長安滿朗誦應能徹九泉

方象瑛

渭仁遂安人官編修

鹿門偕隱已非初玦碎環分事總虛有子早能酬孟母  
爲郎誰復伴相如退朝寂莫空齊案載筆蕭涼獨檢書  
此日安仁秋簾夢西風愁絕鳳城居

龍燮

石樓望江人官檢討

佳人難得尚情鍾何況名家一女宗早織色絲歸繡虎

對嘗冰蘂佐盧龍雖看才子登科記未報仙郎珥筆從  
原下山荆相待久

賤荆以丁巳物故

追隨應得向芙蓉

陳維岳

緯雲宜興人太學生

林風吳苑冷瑤塵才子燕臺歎逝辰  
彤管尚留齊女墓翟車不見漢官春  
束芻祭信傾名士除服詩篇感路人  
共羨俸錢營葬日玉堂夜雨獨傷神

倪燦

關公上元人官檢討

負戴相將隱薜門宦遊不屑問田園  
何期落葉寒風急獨掩空房夜雨昏  
垂老詩成真似讖勸兒北上口忘言  
書來并滯燕山淚萬里憑誰送遠魂

米漢雯

紫來宛平人官編修

共說宣文閫閣師那期俄動逝川悲多年力作兼窮達  
千里間關備險夷羅綺影沉仙馭杳珮環聲斷總帷垂  
却憐玉樹干霄近綸綍重看錫鳳墀

嚴繩孫

蓀友無錫人官檢討

夢斷青綾罷夕熏天涯芳草妒羅裙卽看荀令愁無限  
迥識京陵意不羣笛裏關山官舍月鏡中金粉釣臺雲  
而今賸泚龍門筆自向彤編傳左芬

喬萊

石林寶應人官編修

華門栖隱後雙挽小車遙月白茗同戰花紅泉共澆柴

荆新曬藥蕙帳舊銘椒雲與長天遠香魂何處消  
惜別三千里驚心四十年堂前多綺饌宦後少花鈿淚  
盡拈湘管愁深問紙錢讀殘傷往句應悔賦甘泉

高詠

阮懷宣城人官檢討

驂鸞入月返無期才子徒銜奉倩悲客裏悼亡頻下淚  
篋中寄內尚畱詩鹿門遲暮虛前約鴻案淒涼異昔時  
獨有大姑名不泯更于彤史見遺規

張鴻烈

教文山陽人官檢討

楓落烏啼冷玉鈿斷腸歸去翠微天蒲輪濶絕三千里  
蘼白艱辛四十年蝴蝶夢尋蕭史署杜鵑聲慘孝廉船

饒君雅擅黃門誅只是招魂已惘然

白夢鼎

仲調江寧人官大理評事  
二首

風雨偏侵靜好琴宮音倏變作高音重逢或有三生石  
永別難堪兩地心擬共桑麻龐德隱還驚車轍老萊深  
而今良友辭闌閣縹緲雲山不可尋

雲散長空月墮烟思家憶上北來船誰知永訣無生日  
卽在褰裳話別年彈指光陰如過隙重來邂逅失前緣  
麟膠鳳髓真奇寶難續淵明太古絃

毛升芳

允大遂安人官檢討  
二首

楓冷吳江落照寒忽驚哀羽掠長安開槭有淚悲分鏡

敬枕無聲痛隻鸞  
鴻案蕭騷餘舊夢  
荀香寂歷怯新歡  
金闈玉樹相輝映  
差賁泉臺慰寸丹

前身只合是書仙  
婉婉工容美靜娟  
南浦情淡金鴨裊  
西堂書富玉釵妍  
征車惜別三秋路  
遺粉空悲百歲緣  
他日香奩存麗句  
殷勤太史好重編

麗

塏

雪崖任丘人官檢討  
二首

傳道名媛沒行人  
亦慘然甫能聞子捷  
應諗相夫賢象服  
雖沾命鸞膠豈續絃  
白頭京洛客痛哭望江天  
握手辭鄉里人來報計期  
秦嘉留恨句潘岳有哀詞  
忍憶生離日卽爲死別時  
殊恩不共享喜罷却成悲

陸

榮

義山平湖人官編修

揮涕青郎憐滴露結眉記室嘆涵烟古人心事皆淒絕  
此日詩懷倍黯然已負鹿門偕隱約還期牛渚再生緣  
淚痕滿紙難終讀宛轉空山叫杜鵑

哀絃集

挽詞

毛際可 會侯遂安人官知縣

減字木蘭花

牛衣重濕榜下當年相對泣落葉添薪微祿何當拂甌  
塵 徵書嚴切杯酒臨岐成永訣歸計俄延目斷南飛  
鴈影邊

鄧漢儀 孝威泰州人官中書

意難忘

雪地冰天忽飛來一騎苦淚涓涓低徊如欲語哽咽更  
難宣說伉儷委金鈿杳杳化風烟誰歸云嬌兒正馬夜



度桑乾 空誇錦瑟花磚把鴛鴦隔斷竟致黃泉病時  
誰藥餌死日恁流連問信息總茫然祇夢裏周旋愁看  
取都門碧柳陣陣吹綿

曹貞吉

實庵安丘人官中書

小諾皋

德耀眉齊少君車挽十載牛衣人淚憶當年白袷翩翩  
比肩蘭蕙夫子龍城綰綬紫塞風沙難避賦歸來還共  
東籬憔悴詠絮庭閒篝燈門閉慰白頭佳兒佳婦百歲  
相看何已蝶夢醒偏無幾 日下蒲輪江邊桂楫驚起  
山中濃睡全不管西風病骨慊慊情思環珮珊然去矣

垂老寧堪傷逝轉眼便泡影空花相似綺戶絲繁鏡奩  
塵細怕黃昏繡簾微雨滴入愁人兩耳更莫聽蛩吟碎

徐

鉉

電發吳江人官檢討

孤鸞

亂鴉啼歇正鈿瑟空彈鳳簫聲咽爲憶梁鴻舉案向誰  
重說夢到故園庭院恰漫天謝庭飛雪枉有金門待詔  
悵椒花頌絕 嬌少君德耀芳名揭羨官誥五花九霄  
重接怎赴瑤池去惹安仁淒切回頭玉河春暖又看看  
芳菲時節吟取哀蟬落葉增幾莖華髮

曹廣端

正子願天人官主事

孤鸞

和宋人韻

一朝淪忽似比翼初分瑤臺乍別夢憶鄉關潘岳招魂  
淒絕空吟五噫誰和爲天書徵來丹闕聞道乘鸞去  
矣變紫髯似雪記那時離別丁寧說耐春冷孤衾淚  
痕雙頰聽杜鵑枝上正聲聲啼血異鄉疾風零雨又清  
明斷腸時節脉脉閒愁打疊任江湖嗚咽

陳維崧

其年宜興人官檢討

徵招

蕙叢去後徵之怨當時韋娘年小別後鏡鸞分悵天涯  
人老小屏歸路悄悄重疊吳山清曉此夜遙憐水哉軒

畔月明多少 侍史慢薰衣金門啓愁聽穿花漏早別  
燭鼓冰絃又犯些商調彩毫憑起草錯認畫遠山眉稿  
不信是白玉爲堂頓玉臺人杳

田茂遇

髯淵華亭人官知縣

玉女搖仙佩

神傷奉倩又是經年兩度來鴻去燕望裏家園樓空鳳  
杳掃盡百花如霰冷落閒庭院早烟鎖瑤奩塵封鈿釧  
寶瑟畔女嬃忽墮巷杵停聲林鶯罷囀便節序當秋依  
舊蟾輝姮娥不見處處月明如練獨與吳剛盼斷廣  
寒宮殿鳳軫空彈鸞膠莫續寂寞蓮燈歸宴別是難消

遣鷄裘解提起臨行針線抵多少杜蘭香去萼綠花來  
夜闌數遍銅壺箭坐歎息云亡邦媛

朱彝尊

錫鬯秀水人官檢討

東坡引

遠書沉錦軸返魂無藥錄迴腸最是柴車促雲屏那時  
囑雲屏那時囑玉堂此夜青綾縱好遜頭白鴛鴦宿  
蘆簾紙閣情難續茶瓶兒一曲茶瓶兒一曲

李良年

武昌嘉興人太學生

一叢花

夢中釵鏡石湖濱書到轉傷神細君不待東方朔負詆

諸割肉金門錦字銷沉燭香斷絕簇蝶冷湘裙  
法寶  
曾共挽車人回憶塞垣春重題柿葉翻時句楚蘭紅句  
處招魂五夜朝衫一燈佛史莫漫染啼痕

哀絃集

輓騷

汪楫

舟次休寧人官檢討

小招一章

秋飈勁兮玉梁芳草悴兮金閨綠滋摧兮隕黃朱華墜  
兮飛霜被鳳翼兮安翔於孤鳳兮徬徨高冥沈寥兮不  
可以相將命靈氛兮叩巫陽操瓊笈兮瞰上皇蘭何焚  
兮玉何戕鶴翩翩其入市兮櫺珊珊而繞廊豈麻姑之  
鳥爪兮指東海之三桑招雲輶兮不回俾君子兮盡傷  
鸞啾啾兮爲從驂離離兮兩龍佩瑤枝兮謁有娥盍返  
旆兮登穹窿珠爲蓋兮琳爲宮張雲璈兮筵巨鑪左宓

妃兮右雲中餐朝霞兮飲夕虹采赤松之靈草兮奚痼疾而弗攻及秋菊之芳菲兮揚輕袿以臨風招雲輶兮不迴俾君子兮心忡猊猊猊兮錦韞褱白象兮乘青蓮前文殊兮後普賢曷返旆兮遊靈山

行述云夫人聞穹窿靈岩諸勝欣然

慕之此志未遂因陳兩山之勝以爲招云

憩鷲嶺兮息金闕芬薝蔔兮燃梅

檀列寶樹兮班班鳴迦陵兮關關伐毒鼓兮齎齎委珠纓兮仙仙味醍醐之禪悅兮澄性海之狂瀾散法王之花雨兮滌火宅之煩冤及嚴霜之未實兮麾明葆以言旋招雲輶兮不迴俾君子兮潛然巫峽兮興雲瞻英皇兮乘紫麟衣白霓兮裳綠蓀擁西皇兮出上清鸞鳳前



導兮霞鱗鱗絲綸在味兮生陽春詔君子兮闢金門翟  
爲第兮鳳爲巾玳筵玉解何續紛鈿釵未改鏡未塵整  
施容光朝 玉宸魂兮歸來依日輪母爲縹緲隨氤氲  
招雲輶兮不迴俾君子兮傷神

馮 璉

再來臨海人官刑部侍郎

有懿淑媛兮系出大家來嬪吳興兮威儀孔都相我夫  
子兮蔚爲名儒漏殘月落兮一燈坐隅絲絃狼藉兮縈  
繞詩書夫子筮仕兮單車載驅佐以仁恕兮令聞永譽  
五畝吳趨兮歸來共娛奉我尊章兮滌糲甘腴胡爲不  
祿兮墮璧沉珠夫子應召兮翱翔天衢有子繼起兮鳳

將其雛千里間隔兮山川鬱紆終天永恨兮幽明異塗  
兩地痛絕兮何由暫舒子荆作賦兮涕泗與俱啼鳩唳  
鶴兮絃絕響徂蛛網覆奩兮屋煤暗鋪傷如之何兮魂  
不可呼

哀絃集

誄文

經筵講官刑部尚書同里年眷弟宋德宜拜誨

維 康熙十七年九月十九日

皇清勅封孺人尤老年嫂曹夫人卒於家春秋五十有  
八嗚呼此我友悔菴先生之淑儷而孝廉珍文學瑞之  
賢母也孝廉邸中聞訃旣素輶星奔麻衣遄返悔菴方  
以金門待 詔玉几求賢築館都亭授餐闕下屢申請  
急之祈未驗還鄉之夢援琴以哭悽踰巴峽之猿鼓缶  
而吟愁甚衡陽之鴈時則燕齊魁壘之士影華組者三  
千鄒魯文學之賓捧珠槃者十九聆斯楚曲咸致神傷

况我良朋尤爲心痾昔者三年未返還吟零雨之篇六  
日不詹尚謠采綠之什樓前送客界粉成痕陌上懷人  
結眉表色何況瓊田大去碧海無歸廖家胷井想竊藥  
以何年酈縣寒泉擬煎香而無術暫游京雒便爲鶴返  
之期小別鄉園遽應牛眠之讖良云已甚亦又何言此  
則染湘江之竹未能喻此酸辛彈蜀國之絃不足方其  
悱惻者矣夫蕙叢早殞元微之所以悲來遺挂猶存潘  
安仁於焉涕下此皆伉儷之恒情何況裙笄之令範可  
無揚挖用表幽貞嗟乎金閨城下遙連齊女之門石鏡  
山邊卽是武擔之路表桓釐之行爭傳沛國諸生稱陶

母之賢競說長沙人士爰爲斯誄以志予哀其辭曰  
余與悔菴門夾葑溪花紅戶向柳綠簷齊俱邀戲馬並  
載聽鵬橋分鷁誤巷肖鶯迷時過君家約爲文社雪霽  
窓融風狂燭地倦或呼觴豪偏索炙隔帷食器每鏘中  
夜乃知吾友室有鴻妻寧憂釜爨詎謂糠肥貰來村釀  
乞得鄰醯拔釵庸惜剗薦誰疲統統鼓聲漏踰三下君  
爲余言婦真健者敏旣踰班慧偏鏤謝手擷蘋繁躬親  
桑柘施衿結悅習禮敦詩倚歟季女變彼諸姬柔嘉維  
則淑慎其儀聲高璜璫譽溢盤匱色婉容承顏堂上  
婦職攸勤女紅無曠鞠臙而前鳴環以相私勗青雲頻

寒絳帳君言未竟余喜而呼何期淑女儷我鴻儒間訊  
他人斯寧有諸人言不爽君語非誣吳質長愁禰衡善  
罵我友高才文場雄霸猿臂難封蛾眉不嫁對酒謹叟  
臨風悲吒晚紆尺組人喜君嗔噲寧堪伍龍寶難馴孺  
人笑勸一語聊陳不聞毛義捧檄娛親君顧孺人欣然  
道左月照城樓天低箭塚白草煎霜紅旗掣火爲窮塞  
主亦無不可北平數載綦縞言歡其或尼君鐫其一官  
孺人含笑家本吳關非無樵笠亦有漁竿椎髻歸田芸  
瓜刷笋梅福雙仙龐公偕隱酒賣相如瑟彈楊惲絃索  
宮詞琵琶院本君舞斑衣孺人六珈君悲窆絳亦經正

麻助君沐櫛從君挽車江通孝鯉樹止慈鴉先是贈公  
爲君析宅舍後一區水雲俱白詎用高甍底須列戟俾  
請於翁于斯偃息君聞是語起舞而旋能如是乎與汝  
偕焉編籬竹次抱甕花間層廊映水小艇尋烟往復循  
環盈虛依倚于門不大古無斯理未在其身必於其子  
果以卯秋佳兒鵲起非惟鵲起亦有鴻騫拔茅連茹爰  
應今年羣公薦士

天子徵賢翹材千百君實哀然竹徑松門臨行搔首將  
我重來能無恙否孺人款語分張詎久白月明明爲君  
治酒西風落葉忽滿長安何來惡耗竟墮君前發函淒

哽伸紙沈瀾身留北闕淚寄南天來歲新春凌雲賦噪  
渌受重封仍膺疊誥而我所悲禮宗是悼杳杳黃  
壚飛飛丹旄嗚呼哀哉



哀絃集

祭文

都門諸先生公祭文

保和殿大學士太子太傅兼戶部尚書李霽保和殿大學士太子太傅兼禮部尚書杜立德文華殿大學士兼刑部尚書馮溥予告太子太保禮部尚書王崇簡吏部尚書郝惟訥戶部尚書梁清標禮部尚書吳正治兵部尚書王熙刑部尚書宋德宜都察院左都御史魏象樞吏部左侍郎張士甄原任兵部左侍郎曹國柄刑部右侍郎馮甦都察院左副都御史金鉉內閣學士兼禮部侍郎項景襄李天馥翰林院掌院學士兼禮部侍郎陳

廷敬詹事府詹事沈荃王鵬昌太僕寺卿楊雍建詹事  
府少詹事王澤弘翰林院侍讀學士葉方藹孫一致侍  
講學士張英嚴我斯大理寺丞施維翰督捕右理事官  
張永祺左春坊左庶子莊同生右春坊右庶子張玉書  
左春坊左諭德盧琦右春坊右諭德祖文謨司經局洗  
馬儲振翰林院侍讀王士禎吳國對侍講朱典韓莢趙  
文熹左春坊左中允周弘右春坊右中允吳珂鳴孟亮  
揆左春坊左贊善陳論王鴻緒翰林院修撰彭定求編  
修顧祖榮胡會恩翁叔元沈三曾沈涵彭會淇熊賜瓚  
李應薦楊瑄高裔李濤陳錫嘏檢討朱阜李振裕沈上

壩繆錦宣李柟龔章田成玉王瑞閭世繩吏科掌印給事中李宗孔給事中張鵬兵科給事中姚祖頊工科掌印給事中丁泰福建道御史程文燹河南道御史羅秉倫山東道御史謝兆昌吏部文選司郎中楊名耀稽勳司郎中鄭重文選司員外于漣戶部雲南司郎中吳子雲廣西司郎中詹惟聖刑部四川司郎中馮雲驤工部虞衡司郎中劉彰兵部督捕員外金祖彭刑部貴州司員外宋犖江南司員外王照候補員外主燕戶部江西司主事林堯英兵部武庫司主事慕珏刑部江南司主事于覺世江西司主事俞陳琛刑部廣東司主事謝重

暉候補主事王士祐曹廣端候補知府何源濬順天府  
治中金祖庚光祿寺丞何棟大理寺副丘象升左評事  
白夢鼎太常寺博士王頊齡國子監博士劉賓廷中書  
科舍人陳玉璣裘充美行人司行人李錦汪彰候補行  
人劉師峻內閣中書科舍人高士奇曹貞吉顧焯沈曾  
願曹禾喬萊候補中書舍人吳甫及朱雯國子監典簿  
王禎翰林院孔目杜登春等謹以清酌庶羞之儀致祭  
於

皇清勅封孺人曹氏尤老夫人之靈曰嗚呼禮終陰教  
象始坤貞內德之茂匪詠奚徵平陽鼎族沛國高閼夫

人自出嫺和淑清躬循女史家號諸生早吟絮柳旋界  
茗荊鱗鱗魚媵鏘鏘鳳鳴非無純穀亦有瓊瑛縞綦是  
御蘋藻斯盛琴離繁袞皎潔衿纓獻蘭受蒞澣裳漱絃  
白華鮮色元琴靜聲此賓與缺彼拜樊英葯房芸館單  
思研精視星曉幌擁雪寒縈何以相之銀鉞繡綳緇帷  
馳譽珠槃蒞盟龍門逐客雉脂在庭何以遺之衝牙珮  
珩北平佐郡鳩署鸞輶踐華不侈履貴非盈素絲交勗  
丹筆崢嶸五湖歸去褕衣謝榮耀期偕隱宣文授經挺  
茲琳樹風彼金籬芝田雙秀桂林一莖良苗方穫介福  
將并山風告疹菌露摧形實香枯壤瘞玉幽扃于時夫

子豪筆承明凌雲舊價受知

孝陵前席再召上林待賡從容紫闥出入 彤庭千里  
一計神傷骨驚蕙叢寫怨檀奴愴情金釵画篋空簾虛  
楹晨猿淚集夜鶴哀縈矧今親串夙稟芳程母儀婦順  
目擊心傾音徽未沫竹素猶青誰司赤管播此芳馨鳴  
呼尚饗

海鹽彭孫通謨

同舉諸先生公祭文

原任江南安徽布政司使法若真原任湖廣布政司使  
畢振姬河南河北道參政趙進美原任開歸河南道參

政上官鑑原任浙江督糧道參政王紫綬原任江西嶺北道參政湯斌原任河南汝汝道副使張瑞徵分守青州海防道參議張能麟原任江南蘇松道參議李來泰原任江西湖西道參議施閏章原任湖廣糧儲道參議王孫蔚原任江西督糧道參議戴王綸原任湖廣提學道僉事魏學渠原任福建興泉道僉事葉灼棠原任翰林院檢討秦松齡原任吏部考功司主事張新標刑部四川司郎中馮雲驤戶部江西司主事林堯英原任戶部山西司主事汪琬候補主事米漢雯陳宏葉封彭孫通中書科中書舍人陳玉璣大理寺左評事白夢鼎太

常寺博士王頊齡行人司行人汪黼候補中行評博方  
象瑛高層雲內閣中書舍人曹禾喬萊候補中書舍人  
沈珩陸萊趙廷錫李鎧柯崇樸登州知府譚吉璉原任  
杭州知府嵇宗孟原任廣信府同知侯七乘開州知州  
孫榮上海知縣任辰旦祥符知縣毛際可景陵知縣李  
念慈睢寧知縣陳鴻績清源知縣儲方慶蒲縣知縣顧  
鼎銓真寧知縣徐之凱原任嘉定知縣陸龍其原選新  
城知縣田茂遇候補知縣江闔許自俊黃與堅錢中諧  
候補選州同徐嘉炎龍燮陸次雲京衛武學教授王岱顓  
榆儒學教諭汪楫舉人考授推官宋實頴舉人倪榮范



必英柯維楨太學諸生陳僖黃虞稷王嗣槐吳農祥吳  
任臣陳維崧李良年丘象隨申維翰閔若璩吳雯鄧林  
梓葉奕苞黃始毛升芳張鴻烈徐鉉周清原惠周惕金  
居敬宋涵馮勗布衣鄧漢儀孫枝蔚李因篤陸元輔毛  
奇齡嚴繩孫朱彝尊蔡方炳王昊等謹以清酌庶羞之  
儀致祭于

皇清勅封孺人尤老年嫂曹夫人之靈曰嗚呼風肇睢  
鳩淑女難得象垂風火富家稱吉是以健婦持戶力勝  
丈夫詞客悼亡悲深琴瑟況乎遠道參商燕吳阻別未  
訣差池心腸摧絕嗚呼孺人令德具宜曰勤曰儉無非無

儀井曰是操綦縞是好裝却少君賢齊德曜夫子筮仕  
從官朔方勗以清白不改糟糠析楊哀楚側聽霑裳願  
多平反遠紹于張騏驥偶蹶敬通歸里書滿通都高言  
何綺

先皇動色嗟稱才子 龍馭遽遐鹿門歸只簪冠椎髻  
偕隱是矢一壑一軒芙蓉秋水

天子曰咨嘉汝宏詞鶴書敦促責在有司孺人勸駕君  
行無遲兼將雛鳳就試禮闈中夜治裝力疾縫衣誰知  
揮手無相見期昔供婦職言采蘋繁今尋所歷機杼空  
存昔張客筵尊簋立辦今慘虛幃誰具華饌兒奔母喪

父送子歸旣違死訣復痛生離哀詞如錦隕涕如縻鳴  
呼徐淑書沉秦嘉久客蘇姬罷織寶酒腸結吞聲奉倩  
老更傷神多才孫楚情至成文真等交同縞帶並集金  
門聞吟謝絮遽惻莊盆馳思總帳合酌椒樽嗚呼薊北  
江南悵望何極彩雲易散白日西匿入月驂鸞逝不可  
測招魂歌些靈其來卽尚饗

宣城施閨章撰

同鄉親友公祭文

年眷弟宋實穎宋德宜年家眷弟何棟汪琬錢中諧李  
嘉猷范必英王復陽管正仁吳芹陳宏孟亮揆翁天游

吳兆官孫賜年家眷小弟王瀛周象穀曹漢顧丁璫蔡  
方炳年家眷晚弟王式鉦項亦鑾席啓寓年家眷侍生  
韓葵年家眷晚生金祖彭金祖庚金秉綸陸世恒王曾  
斌張壘李聖芝顧嗣曾徐祖留宋兆鶴凌琪王師捷王  
宇禮年家眷姪繆錦宣王吉武王原祁顧焯侯開國王  
申荀孫致彌吳樹臣吳訥馮勗沈朝初宋廣業申珂王  
銓王汝旦年眷姪沈曾顧蘇翔鳳蔣陳錫惠周惕宋景  
琪宋駿業門生徐蘭金秉福葉豐表甥朱典朱三錫表  
姪蔣廷銓姪壻張梈等謹以清酌庶羞之儀致祭於

皇清勅封孺人尤母曹老夫人之靈曰嗚呼孫子荆之

傷逝怨起秋風潘安仁之悼亡悲深長簾况復觀光上  
國秦嘉有寶鏡之貽永別里門徐淑抱飛蓬之感仙臺  
一去悵矣簫聲玉顏旣辭空餘琴曲情之至也痛可言  
乎恭惟夫人作配名賢克相我友才子翩翩凌雲興歎  
當宁喟然文似相如遇比青蓮牽絲入仕驅車薊北紫  
臺何遠關山無極夫人佐之左琴右瑟報政三年安其  
蠶織一官拓落拂衣歸里閉門却掃綠沉細綺夫人舉  
案旣有美子脫略公卿跌宕文史熊兒直上賢書是陟  
袞師最嬌鑒戰闌棘夫人筦爾杏苑漸逼還憶當年馬  
蹄得得門開三徑園延二仲投轄論文松風入夢鹿門

同隱秦樓偕弄功名晚晚俟之小鳳天倫樂事旗槍汲  
甕夫人愉焉蓬萊仙洞關門曠典弓招我友盛名之下  
薦辟舉首

詔起田間如獲山斗大夫三事河梁勸酒夫人倣裴逮  
及糧糗夫子在前佳兒在後莫負王程彈冠結綬昊天  
不弔拂意十九別未三月柳忽生肘班扇空懸竇機誰  
扣芝醴無緣菖蒲徒咎嗚呼哀哉悲莫悲兮形影相離  
慘莫慘兮夢魂長別君門萬里惜瓊珮之徒芳子舍依  
然悵瑤池之莫逮逝者如斯生兮難再嗚呼哀哉穎等  
誼屬兼葭情通風雨琉璃硯匣久挹鍾儀翡翠筆牀嘗

披謝絮青牛帳裏愁疾難蠲朱鳥窓前妝臺何在敬酌  
蘭漿爰邀鸞彩尚饗

長洲宋實穎撰

又

原任 經筵講官兵部尚書加三級今丁憂王熙率男  
都察院經歷王克善謹以清酌庶饘之儀致祭於

皇清勅封孺人尤老年嫂曹老夫人之靈曰嗚呼勾吳  
勝地聳翠環流鹿門道韞家詠雌鳩倚嗟孺人實邁等  
儔家世肇錫起自望族平陽華系繡虎枝屬發光璀璨  
乃降於庭珠淵玉璞山榛隰苓梅花柳絮詩禮兼能長

諸琴瑟曰嬪高門當始于歸整躬服勤樂彼儒素鉛華  
勿親敬事尊章一本孝心奉甘茹藥秩秩德音爰相君  
子丙夜篝燈雞鳴戒旦相與有成明經高選佐理北平  
皆其黽勉無貽墨餅于時就道塞上孤征周咨治行蒲  
鞭勸懲以爲鷹鷂不如鸞鳳興誦慈祥孺人鼓動洎乎  
歸田釀酒烹鮮種葵藝蔬引養引恬丙壬之歲彈指七  
年蓼莪掩卷南陔涕漣孺人拮据克襄事焉爾其接物  
撝謙雍雍仁而喜施好善無窮授衣授餐御下有容若  
乃庭訓夙稟家風母也而父慈也而師箕裘旣紹猶有  
嚴辭翩翩長子果薦賢書始一色舞慰此倚閭課子獲



雋課女若儒內治外治職思厥居雖有象服勿棄荆布  
雖有簪珥解珮以助惟安淡泊偕隱攸慕禪燈夕照蒲  
團靜坐瞻禮名山絕塵是務允茲令德宜享遐福天錫  
純嘏報以百祿塤箎繼起雲路翱翔鳳池咫尺綵袖飄  
香魚軒入都壽域弘張七章在御

紫誥在望如何罔驗忽而悼亡吁嗟徽音俛仰蒼茫昔  
先文貞終帳青箱君子顧諸問字門牆承是淵源乃瞻  
處囊昌時籲俊啓事薦登甘泉錄賦賦指顧行孺人觀  
止靜好嚶鳴少君德曜永傍長庚何圖瑤島環珮琤琤  
吳天比翼別鶴燕京撫今悲昔感愴縱橫然而孺人悟

徽宗乘今返兜率幢接花迎十洲三島金母同升亦有  
舜華朝榮暮零孺人週甲詎異冀靈可以含笑幻泡死  
生熙伏苦塊罔極蒿吟遙浥清酒聊擷芳蓴言瞻南國  
烟霧沈沈仙車鳳蓋魂兮式臨哀哉尚饗

又

原任廣東長寧縣知縣年姍家眷弟彭璫率男翰林院  
修撰年姍家眷姪彭定求孫孫壻始乾謹以清酌庶羞  
之儀致祭於

皇清勅封孺人尤太老親母曹夫人之靈曰嗚呼孺人  
壽止於斯人倫鮮順天道難知存歿睽隔曾不幾時家

追母範人悼女師矧我兩家比鄰結宇肺腑同傾齒唇  
相輔愛及兒曹交情復古申以婚姻式歌且舞觀此孔  
哀使我心摧夫君待

詔遠在燕臺棘人銜恤擗踊南來同歡共戚中夜徘徊  
昔我喪偶含悲鼓缶雙親告勞誰操井曰一子伶仃童  
年無母每羨良朋得天獨厚孺人之賢超今邁前牛衣  
罷泣鴻案高舉宦遊塞上不名一錢我來落魄斗酒歡  
然歸田偕老樂此綦縞閨門肅雍儀型式好膝下承歡  
蔚爲國寶婚嫁旣完百年永保白首好迷亦又何求今  
茲薦辟

恩及林丘亨衢接武實稱壯遊孺人顧之庶寫心憂我  
亦色喜是父是子我子索居幸旣覲止彈冠之慶非偶  
然耳詎意深秋沉疴不起音問迢迢風霜沈寥蕙帷閨  
寂彤管蕭條天涯遠訃魂驚骨銷乞身未允雨淚俱飄  
顧念亡妻載周星紀生未紉蘭死當聯袂冥冥有情睽  
焉雪涕各憶兒孫能無縈繫嗚呼孺人食報猶稽慶餘  
善積亦旣庶幾上有

崇誥下有豐碑苑枯遲速終揚令徽我子猶子登堂未  
及千里寓辭神傷氣悵作誄需才短章未輯薄陳清醑  
靈兮遙集嗚呼尚饗

又

原任 經筵講官翰林院掌院學士兼禮部侍郎制春  
門生徐元文率男樹聲經遠樹本謹以清酌庶品之儀  
致祭於

皇清勅封孺人尤老師母曹夫人之靈曰嗚呼人生五  
十不可爲歿母壽望耆夜臺奚悞亦有淑德終身綦縞  
象服委佗母非不造更育象賢家聲克紹或訪瓊葩或  
摘泮藻遘境非逆受祉不少悠然長往瑤臺閬島亦又  
何求而哀感行道揆厥所以則有難堪生離三月倏傳  
訃函百年伉儷地北天南醫藥不視巫禱不參臯復何

人米貝何含有子偕行悲恤同銜哀哀膝下獨餘一男  
不能奮飛告凶尊嚴追惟母儀壺德之式不聞笑聲不  
徵怒色貞靜幽閒關雎是匹歸我夫子克供婦職善守  
素風盡屏華飾佐讀惟虔刺繡靡釋共此殘燈以消永  
夕上事舅姑守道不忒生則致養歿則致戚周身周棺  
悉經指畫兩子遵教耽於載籍寒暑雖遷攻苦益力用  
以發聞賢書弋獲仲雖踴躍文譽輝赫不日天池追蹤  
比跡猶憶夫子守官邊陲盧龍之塞孤竹之厓不貪爲  
寶無刑是期清風雨袖碧草盈階母謂不如投劾歸來  
高年倚閭以慰其懷爰葺園居顏以水哉杖屨時過觴

詠克諧賞花釣魚俯沼登臺老人樂之謂由婦才十年  
林下清修絕俗簪荆不改髻椎匪惡以和娣姒以調黨  
族夫子安之偕隱空谷何意今年徵書下促母曰往乎  
一吐懷蓄矧有公車扶持而北父子相依無愁水菽曾  
不踰時乃罹荼毒晝揜妝臺夜停織軸蒿目吳雲斷腸  
京轂

朝命難違總帷莫囑送子南奔身留神逐母生所遭本  
無不淑母今則死胡爲太酷天豈不仁靳此完福文忝  
門牆踰三十年受書牀下問字亭前備聞順德溢於里  
廛庶俾閨閤奉以周旋方踰中壽亡也忽焉朔風蕭瑟

臘雪綿延黎山石摧西池水湮心夫子心涕泗淪漣炙  
雞絮酒告於几筵靈知不遠降而鑒旃嗚呼哀哉尚饗

合郡公祭文

嗚呼昔頌女士懿則永延公孫三常鏡後章前誰其嗣  
之吳興淑賢吾友尤公少齊淵騫文思驚代夢授筆椽  
堂上夸異殖璧藍田遴擇嘉耦孺人嬪焉孺人維何曹  
叔蟬嫣幼服婉婉秉心靜專曲禮少儀推移解詮于歸  
德門輝耀輜駟夫子抗志願比鮑宣鹿車布裳操作時  
虔迴念初生弄之紡輓逮於姆教繁紉是先抑損無違  
執義拳拳夫子孝友晨葩匹鮮孺人贊之奉以周旋觸



燧刀礪敦牟栝捲細大必飭並戒罔愆高堂裳衣躬親  
煩擱匪無婢媵敢不慎旃一門娣姒七族纒連允稱宜  
家恩禮秩然燕居從容刪裁簡編伉儷相友華鐙夕燃  
詰難交屬互較奇篇夫子攄翰截方規圖峻陵喬嶽洪  
決大川馳走寰寓金石彫鐫詩歌抑揚叶之管絃海內  
謳誦英藻飄翩聲徹青蒲詞披玉筵象籤繡紱聳動  
九天大科數奇局促陌阡貢舉得職遂赴司銓庶也忠  
養祿頒御廨司李北平竭來窮邊孺人相隨長路迴遘  
蕭瑟官衙氣候苦偏轡幕疏布霜薄颶穿舉案饋食無  
慕臙羶我酌我飲讓水廉泉平反冤獄抽思沉緜一夕

十起覲其保全繫維孺人相勗矜憐動色箴誠愼母忿  
悃羣庶過差薄辱蒲鞭四載羈宦遽返南塵蕪圃三畝  
平疇鬱芊池宿鴛鳬清瀨滌漣奉侍高堂籃輿挽牽或  
掇秋華或擷春妍竦幹繁梅擢波碧蓮四序歡洽以娛  
長年棗栗蜜飴滫瀡和煎左右勸食旣具且蠲再罹大  
故愴怳孔填繆經榛筭渴水飢飭捋茶喪葬釵鋌貳錢  
神啓舊壤貞卜牛眠久邀寵綽封樹不遷鞠子成材  
雙虬躍淵熊膽數噉用助丹鉛孺人曰嘻母苦心痛蕩  
蕩天衢學士所躋苟或怠荒孰就鈞甄嘉嗣國器峙鸛  
騰駘珍也發解若珠出螭瑞也采芣卓犖比肩芳菲盈

堂樹藝蓀荃茲歲戊午

詔旨風傳推進宏詞爲侍從員夫子聞望夙冠八埏徵  
車在門旌開騎聯夫子沉冥采苓山巔誰戀榮達策肥  
乘堅孺人勸行敬庀豆籩爰告祠堂拂拭鞍轡珍從公  
車跋涉吳燕傷哉孺人寸心孤懸勞勩嬰疾肌骨痛纏  
遐不眉壽中道永捐夫子聞訃泣泗涓涓亟命珍返歸  
程式遄慟哭到門悲結闔咽兄弟相持嘔血激湔憐憐  
蘭階淒淒蕙櫨象服疊陳總帳屢奪母也曷適末由攀  
緣行拜 殊錫龍章蜿蜒法宮異命渙自 重乾秘監  
謨詞侍史拂箋榮施虞殯銘勒貞琬嗚呼哀哉尚饗

同莫姓氏不及該載

同里欽 蘭謬文

諸尊長垂賜祭章甚多未能遍刻今祇登都中公祭

文三篇里中公祭文一篇用紀

鴻名于不朽其都中王大司馬彭殿撰二篇里中徐  
學士一篇以世誼姻誼情文尤爲哀至敢並傳之  
志不忘也 侗謹識

哭瑞兒文

維康熙十九年六月十九日吾兒瑞以病卒于家至七月十七日珍兒以訃音至汝父聞之一慟幾絕旣守職不得歸越五日乃遣人回以酒飯奠汝勉叙一言告于吾兒之靈曰嗚呼痛哉兒何死也兒生二十八年今思之猶昨日也兒于癸巳八月十八日生永平官舍故小名阿永吾雖薄宦自郡太守副將軍下至州縣鎮衛官吏皆持羊酒賀司理得子其諸生耆老辦香叩堦下者相屬也家人竊語是兒有福兒生而姣好眉目如畫最爲汝母鍾愛親自懷抱不忍付乳媼手四歲歸里瑤環

彩衣跳走堂戶間親友見者戲呼爲永平人兒輒緇蟻  
相與問荅人皆謂予此非常兒稍長入塾肩隨兄後汝  
謹厚勤學不及兄而穎敏剛決直排乃兄上之汝祖嘗  
言珍也文瑞也其武乎兒愠甚益刻礪讀書稍稍能文  
矣旣補弟子員兩試秋闈矣乙卯汝兄登賢書報至汝  
卽憤懣拒戶不見客日下帷揣摩然至戊午猶未售也  
吾爲汝少聘蔣氏未嫁而殤娶鄭氏甫期而歿再娶金  
氏五年矣生一女尙未有子也計汝父母爲汝撫育爲  
汝教誨爲汝家室者心已盡矣力已殫矣何汝生之福  
而死之促貌之淑而命之酷才有餘而年不足耶前歲

六月吾應

詔北上大兒同行留汝在家侍母豈料行五日而母病  
汝朝則問卜晝則迎醫夜則拜天露禱請以身代奉侍  
湯藥衣不解帶卽母亦嘆是兒孝善事我金陵鄉試見  
不欲行母以小愈強之試畢馳歸而母病已不起屬纊  
之際汝呼號奔走浴衣拭髮含熬附身之具纖悉拮据  
汝以一孺子驟丁大故其驚惶急迫悲哀勞苦艱辛萬  
狀畢萃一時是兒嘔出血所以傷生殞命或由于此  
汝兄奔喪回相持擗踊匍匐苦次稽顙賓客之前未嘗  
愆于禮也又念吾羈棲京邸徬徨戀慕每發家書汝兄

弟各緘一紙叙述酸楚寄貽周匝吾雖揮淚亦爲色喜  
汝素得母憐惜而畏吾嚴然汝愛父母之心一也何竟  
棄我而從汝母遊耶使汝果與汝母九泉相聚吾復何  
憾然而冥冥之中不可問矣吾出門在六月十一日汝  
母送我于屏汝送我于關皆歡然無恙也四月而汝母  
亡二年而汝歿一朝分手永無見期嗚呼痛哉然汝母  
善病吾固憂之猶伏枕者三月汝素彊健不虞其病何  
況死何況七日而死也汝母病箭風汝亦病箭風箭風  
何物旣殺其母又殺其子豈一氣所鍾與然汝兄述病  
甚詳又甚雜問之諸醫究不知爲何症也更可怪者病



至七日危矣篤矣而汝尙不自知汝兄問身子好否曰  
好在問痛否曰無問有鬼乎則曰何所不有惟索湯沐  
浴誦大悲咒一遍斗母咒數遍并令衆人誦咒咒聲未  
畢端坐而逝嗚呼痛哉當是時汝父在京不之問也汝  
母在殯不之顧也汝兄在側不之訣也汝婦在帷呱呱  
者在抱無一言之囑也汝爲有知耶無知耶謂汝有知  
豈有病而不知痛死而不知悲有鬼而不知怖畏者乎  
謂汝無知何以語言了了容色怡然猶知沐浴之潔其  
身咒誦之持其口也以爲矯情鎮物恐汝未必然以爲  
達天觀化恐汝未能及此也吾安得呼汝而問之哉吾

細思汝五行命相皆無死法爲人直道無他腸閉戶讀書不與一事不交一人咕嗶之餘焚香禮佛晏坐而已有何作孽受此短折之報此必吾一生多過獲罪于天然何不降罰于身而貽累于子仰視蒼蒼曷其有極吾初聞訃神魂駭散指指出血肝腸寸斷急欲掛冠而歸哭汝靈床以銷永訣之恨有告我者曰禮子無奔喪之文前不奔爾婦而今奔爾子乎有

君命在若之何以私出也又有告我者曰夫歸一也祭歸爲上休歸猶可今以喪歸千里入門雙棺在目惟有仰天大叫搶于地而已矣是無益于死有害于生也而

珍見書亦曰他日者兒將北矣而父又南是吾父子終不相見也盍少淹留以待兒來乎故吾之前却不歸者萬不得已也若謂我戀功名而忘天性以鰥寡孤獨之身廁公卿大夫之列是非貪則忍義之所不敢出也人生至此雖三公不願况微官鷄肋乎倘得從諸君子後盡修史之職以報

天子之命俟珍兒公車扶携南還買一坏土塋汝于汝母之傍從此披髮入山不復問人間世事矣至于汝有寡婦當養有孤女當嫁汝無子當待長房次子立後以延小宗此皆汝兄事也汝可無慮吾亦不能代汝早計

矣吾年過六十與死爲鄰汝不哭我而我哭汝昌黎所謂少者沒而長者存顛倒莫甚焉逋翁詩云老人喪愛子日暮泣成血老人年七十不作多時別吾又惡知吾生幾何而顧爲汝抱無已之悲耶嗚呼痛哉

讀之腸寸寸斷直是一斛血淚何暇作文字觀施尙白評

情事瑣瑣悲楚纏結幾令讀者聲淚迸下文人筆端有舌安得不如許剝痛黃庭表評

掩抑摧藏零星斷續語無倫次文成歷亂如酈炎憤世之詩昌黎祭姪之作纏綿哽咽愴怆迷離惟有涕淚之痕絕無筆墨之迹也陳其年評

生倫死別最易剝感况坎壈迭見又中年易傷哀樂者耶向讀悼亡諸作憐極痛惋謂過于黃門遠甚今讀哭子文并詩則孟郊顧况都集筆端矣予每見悔菴輒相慰解讀此反不覺淚下要是文能生情耳毛大可評

哭瑞兒詩二十首

憶汝初生右北平退衙喜見綿綳迎高樓挂笏今何在  
猶記樓中啼笑聲

挂笏樓在永平署中

投懷玉燕母加憐母去兒誰乞菓錢地下重逢悲喜劇  
呼兒長伴總帷眠

半世恩勤一旦休歸來望思夢難求瀟瀟秋雨長安夜  
獨對孤燈泣白頭

頻年家信問寒溫一月鱗鴻斷淚痕早起床頭檢寸紙

手書尚有藥方存

六月中不見兒字矣春間寄予咳嗽牙疼二方今早忽檢及之不禁長慟

三年不見眼誰開尋汝無從到夜臺應告冥官求定省

遊魂常向 帝京來

僧彌法護兩兒郎每見攤書聚學堂一夜霜風彫雁影  
天邊孤唳不成行

父兮靡望母靡依只有哥哥送汝歸哭到蓋棺不盡淚  
他年夜雨更沾衣

五年伉儷案眉齊忍令紅顏作鬼妻分手可憐無一語  
祇應泣血化鵲啼

未亡少婦痛無見獨拜麻衣上食時空剩左家嬌女在  
四絃彈斷阿誰知

緇蒲緋柳廿年餘一領青衫未破除今日牙籤都束起

西風鬼火照殘書

玉青堂畔掩窓紗空屋無人弔暮鴉腸斷春來庭草綠

金鈴誰護牡丹花

見書室中有牡丹數本

玉樹生埋謝惠連汝今短命比前賢斯人曾不得三十  
朝菌蟪蛄俱小年

平時健飯儘優游不似清羸洗馬愁何事危病驚不起

遂教弘璧化浮漚

弘璧見字

來從何果去何因慧業生天語欠真汝本無才能作賦  
玉樓豈要掃苔人

神明了了貌恬然密咒琅琅撒手旋若使蒲團留半偈

何殊解脫涅槃禪

一官羈絆竟如何遙望靈帷遺恨多豈戀朝簪歸不得  
歸來怕向鬼門過

東房西舍置雙棺一老何堪掩淚看好待北邙相送日  
白楊荒草共盤桓

哭妻哭子恨茫茫斷盡吳兒木石腸何日三生石上笑  
一聲鐵笛叫天荒

受生曾禱景忠山棹楔猶留殿陛間阿母携來又携去

彩衣仍返碧霞班

見孕時予禱景忠山碧霞元君既生送榜謝恩榜曰慈護

稽首慈悲大士壇一枝楊柳洒琅玕從今永侍蓮花座



等作南詢童子看

見本寄名大士沒時持大悲咒六月十九觀音成道日也

復聞五弟訃信哭之

四首

天外俄驚叫鵲鴿哭殘老眼重霑襟  
祗看千尺渾河水不及秋來淚雨深

家慶追隨七業堂荆花再摘影淒涼  
他年扶杖西山壠怕數秋風雁幾行

予同母七人大兄先故五弟繼之

第五之名未易才人琴俱絕不勝哀  
何期地下成林下大阮還携小阮回

每因家事借躊躇猶聽亡兒問起居  
素日知醫翻不治枕中應火禁方書

弟近爲兒輩檢校家事兒未亡時數往問疾又嘗學醫乃以小恙不起

八月十一日亡婦生忌正六十矣感成二絕

辭家三載在何方  
今得嬌兒來捧觴  
却憶年時粧束了  
下堦手折木樨黃

羅襪凌波屐洛神  
思家更莫泣鮫人  
人間甲子須臾事  
瞥看蓬萊海上塵

八月十八日亡兒生忌又悼二絕

洗兒犀果記三朝  
一霎狂風玉雪凋  
贏得老夫千點淚  
祇應添作廣陵潮

依然秋色可憐宵  
回首吳山舊夢遙  
常是携兒看串月  
行春橋下聽吹簫

亡婦二周志感

一去空房已二年三千里路九重泉  
祇憐故鬼攜新鬼却恨長眠隔短眠  
欲薦酒漿惟有淚未營齋懺苦無錢  
布衾縮脚西風冷殘月哀鴻半曙天

十月聞二兄計哭之

五首

朝啼別鶴夜啼烏嘹唳重摧雁羽孤  
恨欲呼天天亦老淚應化海海還枯

一家半載報三喪兩鬢驚添五夜霜  
石火電光同倏忽此中何處辨彭殤

少君四歲每隨肩垂老分攜魂黯然  
回首可憐春草夢

十年風雨對床眠

一領青衫瘞老儒  
夜臺鬼火漫咿唔  
人生只合焚書舞  
碧水丹山不負吾

送汝奔喪起戴星  
臨岐執手痛難勝  
翻思舊日傷心事  
一樣西風滿地冰

送英姪奔喪前歲珍兒歸亦十月也